



Per enromar ses pled davart la cultura ed il sport aveva la presidenta Elita Florin-Caluori envidà la chapella Stelser Buaba dal Partenz da sunar. FOTO F. ANDRY

«La grond'impurtanza da cultura e sport»

Pled d'avertura da la sessiun da zercladur

■ (anr/fa) «Sessiun en moviment» è in dals temas da la sessiun actuala: Ina quarantina da deputadas e deputads fa oz sport avant che cumenzar la lavur parlamentara, il tema dal pled d'avertura era ier il sport e la cultura. «Bleras Grischunas e Grischuns sa deditgeschan en lur temp liber u era durant la lavur al sport u a la cultura», ha constatà la presidenta dal cussegl grond *Elita Florin-Caluori* glindesdi cun tegnair il pled d'avertura. Il sport e la cultura porschan sco ch'ella ha cuntinua «in equiliber raschunaivel ed allegraivel a nossa lavur ch'è savens colliada cun blier squitsch». Ch'ultra da quai rinforzian il sport e la cultura er il bainesser e

la confidenza en sasez e permettian blers inscuters fascinants en la vita sociala, ha ditg la presidenta dal parlament grischun. Ina concepziun raschunaivla dal temp liber è a ses avis er in ventil per reducir agressiuns, gida a diminuir la criminalitad u porscha bleras pussaivladads da sa realisar. «Il sport e la cultura èn damai da grond'impurtanza en noss chantun Grischun», ha punctuà la presidenta dal cussegl grond. Ch'ella haja durant ses onn sco presidenta dal cussegl grond vis numerusas giadas «il grond engaschi che vegn prestà en tut las regiuns a favur dal sport e da la cultura a chaschun da differentas occurrenz communalas, regionalas, naziun-

nalas, gea schizunt internaziunalas.» Sco bun exempel ha ella menziunà la festa da musica da la fin d'emna passada a Cuira. En las differentas organizaziuns, uniuns e federaziuns vegnia lavurà cun gronda passiu. Quest engaschi è tenor ella d'avantatg era per la bransch economica la pli impurtanta en Grischun, il turissem. «Gist pervi da quai duain la cultura ed il sport vegnir sustegnids a moda cumplessiva dal maun public, la promoziun dal sport e da la cultura sustegnan effectivamain noss'economia.» Era la lavur politica possia mintgatant vegnir inspirada da la cultura grischuna, ha concludì *Elita Florin-Caluori*.